

# Karzai optužio NATO za ubistvo djece

9 februar 2012 Izmijenjeno 20:19 CET

## Glasnogovornik NATO-ovih snaga u Afganistanu potvrdio incident, ali ne i broj žrtava

Afganistanski predsjednik Hamid Karzai optužio je u četvrtak NATO da je ubio osmero djece u srijedu u bombardiranju u Kapisi, pokrajini pod nadzorom francuskih vojnika, sjeveroistočno od prijestolnice Kabula. Odgovarajući na upit agencije AFP, glasnogovornik ISAF-a, NATO-ovih snaga u Afganistanu, potvrdio je incident, ali ne i broj žrtava. Napad se dogodio u istoj pokrajini gdje je afganistanski vojnik prošlog mjeseca ubio četiri francuska vojnika.

Skupina međunarodnih i afganistanskih vojnika posjetila je mjesto događaja kako bi razmotrila okolnosti incidenta i procijenila štetu, dodao je glasnogovornik. "Po informacijama koje je objavio guverner pokrajine, osmero djece ubijeno je u zračnom bombardiranju osmog februara u selu Gejavi, u okrugu Nedžrabu, u pokrajini Kapisi", istakao je Karzai u saopćenju za javnost.

### Meta 'talibanska oprema'

"Pretprošle noći, specijalne međunarodne snage napale su kuću u Gejavi. Sutradan su njihovi avioni izveli zračni napad na kuću u istoj zoni", rekao je Abdul Hamid Erkin, načelnik policije u Kapisi. "Sedmero djece od osam do 15 godina i dvadesetogodišnji mladić sa mentalno umanjenim sposobnostima, izgubili su život", dodao je on. Meta bombardiranja bila je talibanska oprema u tim kućama, rekao je Erkin, dodavši da je tu informaciju objavio "zapovjedni centar", na navodeći njegovo ime.

Karzai je saopćio da je formirao delegaciju koja će provesti detaljnu istragu o napadu.

Nakon ubistva četiri francuska vojnika u Kapisi u januaru, francuski predsjednik Nicolas Sarkozy objavio je da će Francuska povući trupe iz afganistana do kraja 2013., godinu prije međunarodnog roka za povlačenje borbenih jedinica.

Među NATO-vih 130.000 vojnika u Afganistanu ima 3.600 Francuza.

U Afganistanu je prošle godine ubijen rekordan broj civila, njih 3.021, saopćile su Ujedinjene nacije. Većina njih poginula je tokom pobunjeničkih napada.

*Izvori: Al Jazeera*